



# Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :

f Tir Yimyim

ig tiryimyim@aolima

yt tir yimyim

TAPAK 8

Taruba ita PM Modi-i Ukraine linük semdangtsü

Atletico-i Le Normand alizüktsü mulunga agizükogo



VOL. XXI ISSUE NO. 285 (ADOK 285) DIMAPUR AMUNGNÜ (SUNDAY) CHITENI (JULY) 28, 2024 ₹ 5.00

## PM Modi-i anir NITI Aayog senden amen I.N.D.I.A bloc chief minister tem maden

**New Delhi, July 27, 2024 (Agencies):** Honibarnü Prime Minister Narendra Modi-i New Delhi nung NITI Aayog indang 9th governing council meeting menden ser agiogo.

2047 tashi nung India ya developed nation ka kumdaktsütsü atema iba senden nung tebilembatem lemsatepogo.

Rashtrapati Bhavan Cultural Centre nung amenba senden nung state 20 aser Union Territory 6 nungi chief ministers aser lieutenant governors aden.

Tanü senden nung West Bengal dak alaka I.N.D.I.A bloc ajanga sorkar yimsü asüba state tem nungi Chief Minister tem shinga maden.

"Viksit Bharat @2047" alizüing atongtsü atema state sorkartem aser Centre tsüingda amalitep alitsüba kanga tongtipang ta Prime Minister Modi-i ashi.

"2014 nung India ya alima 10th largest economy liasü aser 2024 nungbo 5th largest economy kümogo. Ano asenok jenjang tasembuba akümtsü alizüing lir" ta PM Modi-i ashi.

NITI Aayog nung state ajak nungi chief minister, Union Territory nungi lieutenant governor tem aser Union minister

## NE nung Kargil Vijay Diwas mongogo

**Guwahati, July 27, 2024 (Agencies):** Indian Army-i July 20 nungi 26 tashi Assam, Tripura, Nagaland aser Manipur nung 'Kargil Vijay Diwas' indang 'Rajat Jayanti' (silver jubilee) mongogo.

Iba benjungmong nung Kargil nung taküm bendanga agütsürtem, parnok kibongtem aser Northeast state nung alirtem linük meimba atema tetushi balala agütsüogo.

Manipur nung Red Shield Division General Officer Commanding (GOC) Major General Sameer Sharan Kartikeya-i Leimakhong Military Station nung aliba War Memorial nung tetushi agütsü.

Kargil rara nung taküm bendanga agütsür tenüing nung Manipur nung aliba Indian Army aser parnok kibongtemi süngdong atemba sentong ka agia liasü.

Benjungmong nungsa tanurtem dang army weapons aser equipment sayuba sentong ka agi aser Army band-i shilem tajung agia liasü.

Indian Army-isa art and craft competitions ayonga agi aser idangji tanurtemi Kargil rara indang tebilemba balala sayua liasü.

July 23 nungi 26 tashi Bishnupur district kübok Moirang nung football tournament ka

tem dena lir. NITI Aayog nung chairman ji Prime Minister Modi lir.

Tanü NITI Aayog Governing Council senden nung states aser UTs 10 nungi shilem magi ta CEO B.V.R. Subrahmanyam-i ashi.

"Tanü senden nung madenertemji Kerala, Tamil Nadu, Karnataka, Telangana, Bihar, Delhi, Punjab, Himachal Pradesh, Jharkhand aser Puducherry liasü aser parnok shilem magibaji parnok akoksaba dang lir" ta Subrahmanyam-isa ashi.

West Bengal Chief Minister Mamata Banerjee-i tanü senden tom nungi medeni ao aser iba atema Subrahmanyam-i ashiba agi "state tem alphabetical order nungbo la anüing dang ang jembitsüba liasü saka lai lunch masü dang jembitsü mepishiba agizük."

"La mapang tembangba sülen Defence Minister Rajnath Singh-i mic nung khen kongshi saka lai o jembiba anener senden nung medeni oadok. Ajisüaka West Bengal sorkar ketdangsurtembo senden nung aden" ta NITI Aayog CEO-isa ashi.

Bihar Chief Minister Nitish Kumar assembly session nung mazüingba agi tanü Niti Aayog senden nung maden ta paisa ashi.

ayonga among aser Senapati o Imphal West district tem nung 'Veer Naaris' aser 'Veer Matas' nem tenüing agütsüba sentongtem agia liasü.

Nagaland nunga Zakhama Military Station nung Operation Vijay nung taküm bendanga agütsürtem nem tetushi agütsüba sentong ka agi. Iba sülen veterans nem tenüing agütsüba mapang agia liasü.

Assam nunga Kakopathar, Pengeri aser Tipong Army camps nung 'A Day with Company Commander' sentongtem ayonga agi.

Iba mapang wako atsüket aser kaketshirtem, tesayurtem, ex-Servicemen aser 'Veer Naris' tsüingda team-building games asaya aser movie tem sayua liasü.

July 19, 2024 nü Golaghat district nung Kargil war Hero Captain Jintu Gogoi, Vir Chakra, (Posthumous) tsürabur nem tetushi agütsü.

Tripura nunga 'Kargil Vijay Diwas' tenüing nung sentong balala ayongzüka agi. July 20 nü 'Veer Naris' aser 'Veer Matas' 12 nem tetushi agütsüba sentong balaka agia liasü.

Tatema Hokolbarnü Albert Ekka Park nung naru yuja tetushi agütsüba sentong ka ayongzüka agi.

## Angami lanurtemi NSCN-K Khango den amalitep malitsü

**Kohima, July 27, 2024 (TYO):** NSCN-K Khango-i Angami company KKB Rülho kibur nem tasüba temerenshi agütsüba atema Angami Youth Organisation (AYO)-i parnok den amalitepa kecha malitsü metetdaksüogo.

Honibar nikongdang Ministers' Hill nung osangbener den jembidang AYO president Kesosul Christopher Ltu, AYO general secretary Neidilhoutuo Sechü aser unit pezü tirtem- Metekhrieli Mejura (Southern AYO), Khrievolie Zhale (Northern AYO), Neitolie Peseyie (Western AYO) aser Seyieneilhou Keyho (Chakhroma Youth Organisation) ajanga iba osang metetdaksü.

Tanü APO Hall nung AYO presidential council meeting amendang KKB Rülho kibur nem tasüba temerenshi agütsüba onük lemsatepdang iba lemtet agi. NSCN-K Khango-i sen meshiba magütsüba ajanga KKB Rülho nem iba temerenshi agütsü.

NSCN-K Khango ketdangpurtemi KKB Rülho kibur nem death penalty/capital punishment agütsübjji parnok

inyakba ta nangzükogo anungji AYO-i parnok dang nungi Angami contractor ka nem tasüba temerenshi agütsüba atema kulitem meshiogo.

AYO-i Angami region ajanga NSCN (K) Khango telok dang Kohima nung iba ken o angatetteptsü atema jaok. Ajisüaka parnok anogo latetsüba tsüingda maru anungji Presidential Council Meeting nung ken o mangatettep tashi NSCN (K) Khango den amalitep kecha malitsü lemtet.

Kuli tejangja kecha melii NSCN (K) Khango-i tasüba temerenshi agütsüba ya Angami nung ajak anema agütsüba ama züingshitsü ta AYO-i metetdaksü.

NSCN (K) Khango-i mapang latetsüba tsüingda AYO ketdangpurtem den majurutep anungji iba telok nung dena aliba Angami nung ajak adokang ta ashitsü tanü senden nungsa bangjemtepogo.

AYO-i NSCN (K) Khango nung züingsema aliba Angami nung ajak telok nungi pilaa atatsü tetuyuba agütsüogo.

Angami Public Organisation-

i 1993 nung bangzünga aliba ama Naga national groups ajak ka küma meloktep tashi Angami nungeri telok kecha nem-a tax magütsütsü ta tanü AYO presidential council meeting nungda bangjemtepogo.

Iba ken o ya AYO-i agizükogo anungji NSCN-K Khango aser contractor tsüingda jembishini kecha melidaktsütsü. NSCN-K Khango tanishirtemi onok den olemteptsü mulungra Kohima district nung dang ajurutepa olemteptsü. Ajisüaka parnok taruba anogo ishika tsüingda marura onok teinyaktsü inyaka aotsü ta parnok metetdaksü.

AYO-i kechiba sorkar aser ozüing amertem dangi mao ta asüingdang "tesüiba nunga NPGs ajanga ozüing alema sen meshiba tatalokbatem liasü saka sorkari iba maparen mazüoktet" ta AYO-i langzü.

Tang NSCN-K Khango-i Angami contractor ka nem tasüba temerenshi agütsüogo anungji onoki ozü nübertem aser ali kümzüka ayutsü aser contractor-ia onok dang nungi teyari meshi ta AYO-isa ashi.

## Nagaland nung Shiksha Saptah takok ngua mongogo



Commissioner & Secretary Tamsunaro Aier den Education department ketdangsurtemi GHS Forest Colony nung staff aser kaketshirtem den community lennirtem den agiba noksa ka angur.

**Kohima, July 27, 2024 (TYO):** New Education Policy (NEP) 2020 tenzüker küm pezü ajungba tenüing nung Nagaland nunga Shiksha Saptah (Education Week) takok ngua mongogo.

Tanü Shiksha Saptah tembangba anogo nung school aser educational office balala nung Mission LiFE atema Eco-club, Community participation aser Tithi Bhojan ayonga agiogo.

"Tanü kaketshirtemi pei tetsütem, tesayurtem aser Education ketdangsurtem den süngjanglijang tetong atem" ta Deputy Mission Director Samagra Shiksha, Kelhikha Kenye-i ashi.

Kaketshirtemisa school nung aou amshia eco-friendly waste bins yanglu, merükmeju mapa inyak aser süngdonglidong wazüka ayutsü awareness

program agi. Maneni NEP 2020 meteta alitsü atema SMC meetings ayonga amen ta Kelhikha Kenye-isa ashi.

Tanü Commissioner and Secretary School Education & SCERT Kevileno Angami, Commissioner & Secretary IPR and State Mission Director Samagra Shiksha Tamsunaro Aier aser Principal Director, Directorate of School Education Thavaseelan K nungeri GMS Secretariat, GHS Forest Colony aser GMS (Children with Special Needs) Lerie Kohima nung kaketshirtem, tesayurtem aser SMC züingsemtem nem chiyungtsü agütsü.

Tithi Bhojan nung shilem ka ama parnok kaketshirtem nem chiyungtsü lema agütsü.

Tanep School Education ketdangsurtemi Directorate of

School Education Bayavu Kohima merükteta among aser idangji parnok süngdong aser narotem atem.

"Shiksha Saptah ya July 22 nungi 28 tashi state aser linük ajungalen nija, sorkar aser central schools ajak nung amonger" ta State Nodal Officer for Shiksha Saptah, Tamsunaro Aier-i Government High School Forest Colony nung ashi.

Tatembangba anogo Deobar ajuruba agi Nagaland nungbo asüing aser tanü külemi lokteper sentongtem agia tembanger ta Tamsunaro-isa ashi.

Shiksha Saptah mapang Teaching Learning Material, Foundational Literacy and Numeracy, Sports Day, Cultural Day aser climate change o global warming atema awareness programme tem ayongzüka agiogo.

# KVK Mokochung-i ayongzüka training ka agi



**Dimapur, Chiteni/July 27 (TYO):** KVK Mokochung-i ayongzüka Longmisa yimstung nung anogo ka asoshi off campus training ka agiogo, kong lanur 24-i shilem agia liasü.

Training sentong nung Imtisenla ACTO (Agronomy)-i, yimstung nung aliba lanurtem aluyimba nung shilem agidaktsüsü atema onüktem balala benoka jembi, kong konger tsünüba, value addition, poultry, goater, apiary, integrated farming system, aonsotsü balala tsünüba amala densema liasü. Laisa, district kübok tesem balala nung

lanurtemi aluyimba nung shilem agiba indang tatishitsü bener arua jembiba den parnok dang kasaji aluyimba nung shilem agitsü ajungshia liasü.

Khekali Sema ACTO (Horticulture)-i, horticulture kübok lenmang balala lapoka aliba indang lemsatep, koba lanurtemi sen aazüksü aser mapa adokdaksüsü atema inyaktetsü, ta ashi. Laisa, value added products tem good packaging & cosmetic nung züngoksemtsüla ta ashi. Laisa, unemployment tebilemtsü bentetsü atema horticulture nung shishilemba tenzüka takok tajung anguba entrepreneurs

tem indang tatishitsü lemsatepa liasü.

Kasa mapang nung Imtilemla ACTO (Soil Conservation)-i, tzünglu tzü bendena ayutsüba indang onük nung ajemdaker jembi, koba 2019 küm nungi Jal Shakti Abhyan Ministry-i ajungshia arudar.

Training sentong nung shilem agiba lanurtem nem dragon fruit saplings aser anosotsü metsü kar lemja liasü, ajita asünung dang tzü kanga ajema agiba chiyongtsü balala tsünütsü koda tongtibang iba indang lanurtem nem tangazükba agütsütetsü.

# Assam CM Sarma aser Meghalaya CM Conrad na senden amentsü

**Shillong, Chiteni/July 27 (Agencies):** Meghalaya Deputy Chief Minister Prestone Tynsong-i ashiba agi, state ana tsüingda arrtsü nung mangatettep aliba ken o sensaksemtsü atema Meghalaya Chief Minister Conrad K Sangma-i Assam Chief Minister Himanta Biswa Sarma den yakta senden ka ayongzüka amentsü.

Media osang balala ajanga

ashiba agi, senden ya sensaksem tanabuba shilem metenzük tsüingda ayonga amentsü. Iba senden nung arrtsü atema sensaksem mapang benoka sensak amentsü asoshi inyakyim kar asoshi telemtetba agitsü.

Kasa mapang nung mangatettep aliba tesemtem maneni asadangyonga odar, ta Tynsong-i metetdaksü.

Manei Tynsong-i,

Hynniewtrep National Youth Federation (HNYF)-i July 26 nü Meghalaya kübok Umtyngar tesem nung Sohra and Dawki-i oya aliba Assam nung züngoksema aliba garitem sota ayuba aitsüogo.

Pai ashiba agi, lokti tentet balalai parnok sasa jenjang magi-i parnok tebilemtsü bentetsü atema sorkar den jembitsüla.

# Assam Rifles-i sentong balala ayongzüka agi



**Dimapur, Chiteni/July 27 (Agencies):** Kargil Vijay Diwas nüngdem nung Capital College Eco Club den longjemer Assam Rifles-i süngtong atemba sentong ka ayongzüka agiogo. Iba sentong ya "Green Tomorrow: Our Land, Our Future - We are Generation Restoration" omen nung ajemdaker agia liasü.

Süngtongtem ya Science College anasa Jotsoma lenmang nung Capital College campus tasenba nung temja liasü. Eco Club nungi kaketshirtem aser Assam Rifle personnel temi Nagaland nung anguba süngtongtem aser süngjang tetong densema süngtong 500 temja liasü.

Sentong nungsa kaketshirtem nem Kargil Diwas indang metetdaksü aser Capt (Late) Kengruse, MVC-i pa

taküm bendanga agütsüba indang mejeta jembia liasü.

Honibarnü ano Assam Rifles-i, July 27 nü Eastern Command-i ayongzüka hopta tepeyong süngtong atemba sentong balala ayongzüka agiba nung shilem ka ama Aboi nung süngtong atemba sentong ka ayongzüka agiogo. Iba sentong kübok Assam Rifles personnel temi ajak senteper süngtong 150 temja liasü.

Maneni Assam Rifles aser Assam Rifles Public School, Chieswema na senteper July 21 nungi 27 tashi nung Chieswema Garrison, Nagaland nung süngtong atemba sentong ka ayongzüka agiogo.

Hopta ka tepeyong iba sentong ayongzüka agiba mapang süngtong tapu balala 1000 temtsüogo. Tzümpung

asur süngtonlitong wazüka ayutsü atema aser lokti ajangzükdaksüsü asoshi Assam rifles bendanga agütsür lir aser iba nung shilem ka ama Assam Rifles Public School, Chieswema nungi kaketshir 50 aser tesayur 8 anisemer iba süngtong atemba sentong ayongzüka agiogo.

Kasa mapang nung Assam Rifles Public School, Jalukie nung Kargil Vijay Diwas nüngdem nung Assam Rifles-i ayongzüka sentong ka agiogo, kong kaketshir 110 dak tema aser tesayurtemi shilem agia 1999 küm rara nung linük asoshi taküm bendanga agüja raratem nem akümtetushi agüja liasü.

Lanurtem ajungmesotsü aser linük mimtsü atema tanüla ka apuoktsüsü nükjidong nung Assam Rifles'-i iba sentong ya ayongzüka agiogo.

# Dimapur nung tasü mang ka nguteta lir

**Dimapur, Chiteni/July 27 (TYO):** July 27 nü nikongtsüsü 4 ako shi nung, Railway Station Dimapur kikümtong anasa Auto Parking nung nisung ka sür aliba indang osang Railway Station Dimapur Railway Station Master-i written Railway Memo ka agütsüba agizüka liasü.

Iba osang dak ajemdaker duty party iba tesemi aritepa ao aser arishi küm 30 nungi 45 tsüingda asütsü ta bilemba mejangjaba tebur tasü mang ka Auto parking anasa sür aliba nguteta liasü.

Temzüng ozüng kübok timyaksü maparen ajak

tembanga inyakba sülen tasü mang ya PM examination aser identification atema Dimapur kikümtong anasa Auto District Hospital Morgue-i benerogo.

Asüsang yagi khaki half pant ka aser blue jeans pant semer liasü. Pa tola aser tsüingsem kecha mesemi liasü.

Ken o dak sendakba nung asüsanger kinunger aser medemertem dang Officer-in-Charge, Govt. Railway Police Station, Dimapur den (Mobile No. 7 0 8 5 0 5 5 0 2 1 )

tongteprateptsü mepeshia metetdaksüogo.

# CALT-i ULB election nung takok ngur nem tenüngsang agütsür

**Dimapur, July 26 (TYO):** Tawa Nagaland nung Urban Local Bodies (ULB) election agiba maparen nung Chümoukedima Town Council nung menden ngutettsüsa Aor-Aotsür shirnokisa takok nguogo, parnok ajak nem tenüngsang agütsür ta

Chümoukedima Ao Lanur Telongjem (CALT)-i sangdongka ajanga metetdaksüogo.

Tarutsü nung maparen ajak nung akok tashi teka amteper inyaka aotsüsa Tsüingremi lenirtem mojangma ta parnokisa metetdaksü.

# Myanmar nung refugee 1500 dak tema Mizoram nung jenoka lir

**Aizawl, Chiteni/July 27 (Agencies):** Myanmar nungi asendenshir Mizoram-i refugee aika senoka aitar. Osang ajanga ashiba agi, taoba hopta ka tsüingda Myanmar nung refugee 1500 dak tema Mizoram-i aitogo.

Myanmar Army aser Chin National Army (CNA) densema telungpur telok asem rara tali küma aoba mapang ka nung Myanmar nungertem aika tejenokdak bushia Mizoram-i jena aruogo.

Myanmar military-i asendenshir linük kübok Chin adser Rakhine State nung item telungpur teloktem maka arudar.

Ibayongji taoba hopta tsüingda Myanmar nung refugee 1500 dak tema Mizoram-i jena aitogo.

Myanmar nung refugee tem ya Mizoram kübok Champhai, Serchhip, Lawngtlai, Siaha aser Aizawl district tem nung jenoka lir.

Tang asendenshir Myanmar nung aika jena aruba sülen

Mizoram nung Myanmar nung refugee 35,120 dak tema jungogo.

2021 küm February ita military-i sorkar atsüingba sülen item refugee tem ya mapang balala nung Mizoram-i arua liasü.

Myanmar nung dak alia ano Bangladesh nung amendaker aliba Bawm kin nungi nisung 2000 dak tema 2022 küm November ita nungi Mizoram nung jenoker lir.

Item refugee tem ya Bangladeshi Army-i, Kuki-Chin National Army (KNA) anema jenjang agiba sülen Bangladesh kübok Chittagong Hill Tracts (CHT) nungi jena aruba lir.

Refugee tem timba ki balala nung taah agütsür lidar aser kar pei kinunger kidang mesüra medemer kidang jenoker lir aser kasa mapang nung tangartem Mizoram kübok relief camp balala nung lidar.

Mizoram aser Myanmar na arrtsü km 510 talang lir aser Bangladesh den arrtsü km 318 lir.

# Minister Jual Oram-i Tripura nung Bru nung talidak semdangtsü

**Agartala, Chiteni/July 27 (Agencies):** Union Tribal Welfare Minister Jual Oram, anogo ana atema July 28 nü Tripura-i arutsü.

India Today NE den sensaksemba mapang Tripura Tribal Welfare Minister Bikash Debbarma-i ashiba agi, Union Minister July 28 nü arutsü aser 29 nü meyipa aotsü.

"Minister of Tribal Affairs, Government of India Jual Oram-i state semdangtsü aliba dak sendakba nung tongtibang senden ka menogo. Pa Tripura-i asüng arutsü. Senden nung inyakyim ajak takok ngua benoktsü asoshi sensaksemogo," ta Debbarma-i ashi.

Paisa, Agartala tonga aruba sülen Union Minister-i, Union Budget 2024 dak sendakba nung osangbenertem den sensak asemtsü, ta ashi.

"July 29 nü Union Minister lenisüba nung state nung tribal department inyakyim balala indang lepa repringshiba senden ka amentsü aser minister-i osang tajung karbo sangdongtsü imlar," ta Tripura Tribal Minister-i ashi.

Bikash-i ashiba agi, senden amenba sülen Oram Dhalai District kübok Ambassa Sub-division-i aotsü, kong pai Bru nung amendaka aliba tesemtem semdangtsü aser kasa anogo pa Delhi-i meyipa aotsü.

BJP sorkar aliba state tem nung Agniveers nem reservation agütsütsü



July 27, 2024 nü Ranchi nung Agnipath scheme kübok sepai inyaksü janrang lanurtem tendangba mapang tangokba noksa nung angur

**New Delhi, July 27 (Agencies):** BJP-i aniba sorkar aliba state tenet- Gujarat, Odisha, Uttar Pradesh, Chhattisgarh, Madhya Pradesh, Uttarakhand aser Arunachal Pradesh state sorkartemi Agniveer sepai nungi anisüngzüker sepaitem nem sorkar mapa, police aser force balala nung mapa lezmüksütsü, ta sangdongogo.

India-i Kargil War nung Pakistan madak takok anguba sülen küm 25 ajungba amongba anogomong nung item state sorkartemi agniveer nungi anisüngzüker aliba sepaitem nem mapa lezmüksütsü sangdong.

Opposition INDIA teloktep nungi lenirtem, talisa Lok Sabha nung Opposition lenir Rahul Gandhi-i mapang shia Agnipath Scheme anema ola adoker.

Agnipath Scheme kübok Agniveers sepaitem shimmer. Item sepaitem ya küm pezü atema dang sepai nung shimer. Küm pezü tembangba sülen Agniveer sepai shilem 25 dang maneni ano küm 15 tenzüksü atema shimtsü. Iba scheme kübok temsüa alirtemji arrshi küm 17 nungi 21 tsüngdapur lanurtem dang lir.

Hokolbarnü Gujarat nung Chief Minister Bhupendra Patel-i, par sorkari armed police aser State Reserve Police Force (SRP) nung Agniveer tem nem tama maongka agütsütsü, ta metetdaksü.

Chief Minister Patel-i X ajanga, "Iba scheme dak sendakba nung opposition-i osang tai prokbaji aitsütsü tetemsü. Ato kilonser Narendra Modi lenisüba kübok Indian Army aser linük security inyakyim nung temelenshi aika benokogo. Item

mapatong rongnung Agnipath scheme densema lir," ta metetdaksü.

Hokolbarnü Odisha sorkaria, state nung uniformed services nung agniveers nem menden shilem 10 wazüka yutsütsü aser küm pongu apuloktsütsü, ta metetdaksü.

Hokolbarnü Uttar Pradesh Chief Minister Yogi Adityanathia, linük tenzüka sülen anisüngzüker Agniveers nem UP Police aser PAC force nung maongka agütsütsü, ta metetdaksü.

Yogi-i, "UP sorkaris Agniveer scheme renlokdar ta sangdongogo aser item lanurtem sepai nung tenzüka sülen meyipa arudang onoki parnok nem UP Police aser PAC (Provincial Armed Constabulary) force nung maongka agütsütsü. Onoki training junga agia aliba aser tazüokba aliba lanurtem Agniveers ama agizüksü. Ozü sorkari ibaji inyaksü," ta metetdaksü.

Hokolbarnü Chhattisgarh Chief Minister Vishnu Deo Saria, state sorkari police constables aser forest guards densema mapa balala nung Agniveers nem menden lezmüksütsü, ta metetdaksü.

State assembly kima osangbenertem den jembidang Sai-i, Chhattisgarh nungi Agniveer tem Indian Army nung tenzüka sülen state nung police constables aser forest & jail guards shimdang parnok nem maongka agütsütsü, aser iba atemaji kobi melii state sorkari inyakyim lateta menden lezmüksütsü, ta metetdaksü.

Madhya Pradesh Chief

Minister Mohan Yadav-i, state sorkari police aser armed forces nung sepai shimdang Agniveers nem menden lezmüksütsü, ta metetdaksü.

Osangbenertem den jembidang Yadav-i, "Ato kilonser Narendra Modi-i aginüba ama Madhya Pradesh sorkaria police aser armed forces nung Agniveers nem menden lezmüksütsü telemteba agiogo," ta metetdaksü.

Uttarakhand nunga Agniveers nem sorkar mapa balala nung menden lezmüksütsü, ta Chief Minister Pushkar Singh Dhama-i Hokolbarnü metetdaksü.

"Sorkar mapa nung parnok nem menden lezmüksütsü atema onoki ozüng ka agizüksü. Iba tebilemba nung onoki inyakdar. Sorkar department balala nung parnok sempetji amshitsü," ta chief minister-i metetdaksü.

Paisa, sepaitem tenzüka mapang nung taküm bendanga agütsür kibongtem nem sen lakh 10 teyari agütsüdar, ajisüaka sen lakh 50 kümtsütsü, ta metetdaksü.

Arunachal Pradesh state sorkaria Agnipath scheme kübok sepai inyaksü janrangtem nem training agütsütsü aser parnok mapa nungi anisüngzüka sülen state police, emergency aser fire services nung parnok nem maongka agütsütsü, ta Chief Minister Pema Khandu-i sangdong.

Haryana state sorkaria constables, forest guards aser jail wardens shimdang Agniveers nem menden shilem 10 agütsütsü, ta metetdaksü.

Taruba ita PM Modi-i Ukraine linük semdangtsü

**New Delhi, July 27 (Agencies):** 2022 küm Russia-i Ukraine amak tenzüka sülen tang mezüng Ato kilonser, Narendra Modi-i Ukraine semdangtsü aser pai Ukraine Tir, Volodymyr Zelenskyy ajurutsü, ta osang angazüker.

Ato kilonser Modi-i August 23 nü Ukraine semdangtsüa akok.

Tan ita tetenzüklen Ato kilonser Modi-i Russia-a semdanga Tir Vladimir Putin

ajurua senden menogo. Ita ka tejaklen Italy nung G7 Summit alidang Modi-i Ukraine Tir, Zelenskyy ajurua liasü.

Tawa Russia semdangba mapang India aser Russia napronglai nuclear power aser rong yangluba densema lenla aika nung amalitepa inyaksü bangjemogo.

Russia semdangba mapang Putin-i Modi nem Russia nung tematiba civilian award - Order of St Andrew the Apostle agüja liasü.

Jammu nung ano sepai 2,000 tali lezmüksütsü

**Jammu, July 27 (Agencies):** Tawa Jammu nung kiralongra tatalokba kanga bulua atalokba sülen Centre sorkari Jammu & Kashmir nung Border Security Force (BSF) sepai 2,000 dak tema lezmüksütsü atema tuyuogo.

BSF sepaitemji Odisha (Malkangriri) nungi aniteta Jammu kübok India-Pakistan arrtsüleni yoktsü.

BSF battalion ana Jammu & Kashmir kübok Reasi, Kishtwar aser Kathua-i yoka liasü. Ano maneni taruba anogo ishika tsüngda sepai battalion ana Jammu-i yoktsü.

Tesüiba ita ishika Jammu &

Kashmir nung kiralongrartemi timtem kanga agütsüdar.

Honibarnü Kuprawa district kübok Line of Control (LoC) nung Pakistan nung Border Action Team (BAT)-i amakdang sepai ka asü aser pezü yiruogo. Kasa rara nungji Pakistan nung kiralongrar kata khaset.

Rajya Sabha nung Minister of State for Home Affairs, Nityanand Rai-i, tesüiba anogo ishika tsüngda Jammu & Kashmir nung kiralongrar 28 khasetogo aser security sepaitem-a kar süogo, ta metetdakja liasü.



July 27, 2024 nü Laos yimtiba, Vientiane nung India External Affairs Minister, S Jaishankar-i Turkey Foreign Minister, Hakan Fidan den senden amendang tangokba noksa nung angur.

Himachal nung tzünglu dak sendakba lendong nung nisung 56 süogo

**Shimla, July 27 (Agencies):** Himachal Pradesh nung tzüngluruwa mongpu tenzüka sülen tang tashi nung tzünglu dak sendakba lendong balala nung nisung 56 süogo aser sen crore 410 shi jenjang takoksa nguogo, ta emergency operations centre-i metetdaksü.

State nung nisung 21 lungren/azüklen nungi tsüka asü, nisung 18 tzu nung arakseta asü, nisung 8 per agi mechiset, nisung 8 electric current agi puseta asü aser ka tzümetsüng agi ponger ao.

State nung anentsüh lendong nung nisung asüba tatalokbabo mali, ta parnoki metetdaksü.

State nung ki 100 dak tema raksaogo, Public Works Department sen crore 172 takoksa angu aser Horticulture Department sen crore 139 takoksa nguogo.

Shimla meteorological office-i sangdong ka ajanga 'yellow' alert sangdonga July 31 tashi state kübok district 8 nung

tzünglu maneni arutsü, ta metetdaksü.

MeT-isa, state tesem aika nung yipru mopung tesashi den külemi ali nemzüka aliba tesemtem nung tzu metsüngba ajanga süngdonglidong, alu nung aonsotsü aser kiojen aika raksatsütsü, ta tekümdangtsü osang ka metetdaksü.

State tesem aika nung tzünglu maneni aruba ajanga in Sirmaur district kübok Dhaulakuan nung tzünglu 123 mm aru, Nahan nung 74.5 mm, Kataula nung 40.2 mm, Palampur nung 32 mm, Poanta Sahib nung 31.2 mm, Dharamsala nung 27.6 mm, Sundernagar nung 26.8 mm aser Baijnath nung tzünglu 25 mm aruogo.

Taküm June nungi July 27 tashi nung tzünglu shilem 40 ajema aruogo, kechiyong teti agia iba mapang nung tzünglu 321.2 mm (average) arur, saka takümbo tzünglu 194 mm dang aru.



July 27, 2024 nü Parliament House nung Rajya Sabha nung züngsem tasenpurtem anogo ananü Orientation sentong nung linük tatong Tir aser Rajya Sabha Chairman, Jagdeep Thankhar-i jembidang tangokba noksa nung angur.



## TIR YIMYIM YIMOBILEM (EDITORIAL)

DIMAPUR AMUNGNÜ, JULY (CHITENI) 28, 2024

### Temeshiba lartem

**K**odang asenok temenen nisung liasü, idangji asenoki inyaknüba inyak masü saka temeneni inyakdaksünüba asenoki inyak ta asenok temulung meyipa sülen tali jangjaa metetter. Aji oda, asenok temenen nung ali tashi asenok temenen lar liasü. Tetezü asenok madak temenen kibur südaktsü nungji asenoki mulungba ama inyaktsübaji asenok atema mapa kanga tasak liasü, kechiyong alari kiburi ashi angatsüla. Aji oda, asenoki yi mejemner saka ajemer, moko aser sali mechiner saka achir, nüktapangta mebenshiner saka benshir, tiyazü aser tangar anema mejembiner saka jembir, kechiyong itemji asen madak kibur temeneni mulungba mapatem lir. Anungji, asenok kibur temenen talenba nungi asenok mechiok tashi asenoki mulungba masü saka kiburi mulungba inyaktsüsa akümer. Atangji, asenok meimchir taküm ya alima nung teti alitsüba aru masü, saka yangi khen lir külen teti alitsüba limajibo molumi mesüra kotak lir. Aji oda, asenok alima nung khen alidang kibur ka mesüra ka kübokbosa alitsübaji alima yimya dak keta lir, kechiyong teti alitsüba alima ana nungjia kibur kaka lir aser asenok alima nung alidang kibur ana rongnungji koba kübok asenok alarsa lidir, iba kasa kibur meyong lima nungji oagia asenok alarsa alitsü. Tanü asenok alima nung alidang asenok teti alitsüba limaji penzüa asenok madak kibur asütsü raktepba kibur ana, ka temeshi aser ka temenen, ana rongnungji ka shima tenzüksüla. Ibayongji, Laishibai ashir, "Nenoki tashi angaa shiba nem peisasa alartem ama bendanga agütsür, oda tasüba dangi anisang temenen süshia mesüra temeshiba dangi anisang dang tashi angatsü süshia, nenoki shiba dang tashi angar pa purtem nenok lir." Rom 6:16. Tetezü asenok alima nung alidang alarbo alar amasa asütsü, saka asenok jangratema alitsüba malitsüba aser teti tepeladak alitsüba malitsübaji kibur dakji dang keta lir, kechiyong asenokbo alar asünungji kiburi kechi shidir ibaji dang inyaktsü. Anungji, Laishibai ashir, asenok taküm madak temenen kibur mesüdaktsütsü aser asenok temenen lar masütsü asoshi Yisu Khristai pei taküm bendang agütsü, anungji tangbo asenok temenen lar masü saka temeshiba lar lir. Aji oda, Laishibaisa yamai ashir, "...Tsüngrem nem tenüngsang agüjang, kechiyong nenok temenen lartem liasü, saka nenoki temulung ajak agi nenok nem agütsüba tesayuba nung tashi anga aser temenen nungi nüji kümer külen, nenok temeshi lartem küma lir." Rom 16-17-18. Anungji, joko asenok temenen lar masü saka temeshiba lar asünungji, temeshibai kechi shidir aji inyaker. Aji oda, joko asenok temenen talenba nungi salarbo asenok madak kibur kata mali ama asenok inyaknütsü inyaktsü aser jembinütsü jembitsü ta masü saka ano asenok madak temeshiba kibur lir, anungji asenokji temeshiba lar asütsü. Aji oda, asenokibo temenen mapa inyaknüa alitsüa akok saka asen kibur temeshibai memelar anungji asenoki meinyaker. Asenok temenen nung alidang kechi koda asenoki temeneni mulungba inyak yamaji asenok taküm nung Yisu Khrista kibur kümdaktsür sülenbo temeshibai mulungba ama inyaktsübaji asenok mapa lir. Atangji, Khristan kümer külenbo temeshi alitsübaji asenoki linüra alitsü aser melinüra malitsü ta masü saka alitsüla. Temenen talenba nungi salar asenok Khrista nung nüji akümbaji asenok inyaknütsü inyaktsüba nüjiso masü saka tanüla temeshi nem asenok anidaktsütsü aser Tsüngremi mulungba inyaktsübaji asenok mapa lir. Aji oda, asenok temenen nung alidang kechi koda asenok temenen lar kümer ali, yamaji asenok temeshi nung alidanga temeshi lar kümer alitsübaji Tsüngremi mulungba lir. Yimten nüjiso akaba lima nunga senso ka pei linütsü malir saka linük temzüng ozüng kübok alir, aji oda kodang asenok temenen talenba nungi Tsüngrem taochi agi kümzük, iba mapang nung jagi asenok taochi kübok temeshi lar kümer Tsüngremi mulungba nung jajar. Iba tajanzükji teti taküm angutsü saka temenen lar asüba taabo tasüba angutsüba liasü. (Rom 6 : 22-23).

## OLEMSABANG

### TANÜ ASEN LIMA NUNG OCHI YIMDONG NUNG LAOA LIR

~ L.Kika Pongener.

Tanü asen lima nung ochi yimdong nung laoa lir aser aji mesor mali, kechiyong tanü asen lima ya ochishir agi kanga anungakongba lima ka küma odagi. Sorkar nungi tenzüker yimden, arogo, mungdang aser loktiliba ajak nung ochishir lennir/tenzüker agi kanga anungakongba agi asen lima tangar lima ama merenloker aser tejakleni maor. Tesasatsüka, loktiliba ajunga nung ochimashir lennir/tenzüker teimba asüba agi asen lima tejakleni maor. Tanü asen lima nung karbo semchi-semnur tashi chiyunga-jema alitsüsa sen/rongsen rizünga lir, saka karbo temeimtsüka anogo nung khen dang ariana chiyungtsüa maka, sensakpo jenjang nung kibong aika lir. Joko asen lima nung takar o sensaker na tsüngda ongdang (Generation Gap) tulu adoka-dokogo. Kechiyong alima terenlok mapa inyaktsü nungdem nung aruba sen, nubur meyong sen, lokti meyong sen agi ochimashir ketdangser/tenzüker kar dang ajangzüker aser takar akümer. Tanü asen lima nung ochishirbo tamaji/matu-malem ama züngshir aser ochimashir-ang lokti ajak nung kibur kümogo.

Tanü lim arogotem aser mungdangtem reprangdanga ora, kanga tesasatsüka, teimba ka ochimashi/telemsa agi sunga lir. Arogo aser mungdang teimba ka nung lennir/tenzüker tsüngda meputepba agi sunga lir. Tanü arogotem aser mungdangtem inyakyim reprangdanga, teimba ka nung tenzüker shimyim nung ochimashi, tenzükertem küm talila tenzüknudang pei tasoba küm nung ochimashi, rongsen ketdangsuba mapa nung ochimashi, inyakyim teimba ka ochimashi agi sunga lir. Arogotem aser mungdangtem teimba ka Khristar arogo/mungdang masü alima lokti-tentet ka dang mesuka (Liberal) küma odagi. Tanü arogo aser mungdang nung lennir/tenzüker teimba ka Degree tulu-lu azünger adenshir, kati ka den tila mekümteter, pei shia metetba shisangtepdang, arogo aser mungdang karbo telemsa adokba ngua arudagi. Lennir/tenzüker aikati pei metetba/pei angatetba dak alaka, tangar nungi shisatsü magir, pei mulongba agi dang anitsü meranger, aser idangji arogo aser mungdangji rajang kümdaktsür. Shitakba jembidi sura, arogo aser mungdangji, inyakyim ajak nung ochishia, kecha tashishitsü maka inyakba sabang ka asütsüla. Arogo aser mungdangji sorkar nungi tenzüker, loktiliba ajunga ochi inyaktsü angazükdak sabang ka asütsüla. Arogo aser mungdang jagi tanga loktiliba ajunga dang ketdangsuba mapa nung ochishia inyaka sayutsüla aser loktiliba ajak melenshidaktsüba sabang ka asütsüla.

Kanga tesasatsüka, tanü asen lima sorkar mapa nunga, sorkar tenzüker karibo linuk terenlok nungdem nung agütsüba sen ochishia ketdang masür. Linuk terenlok mapa inyaktsü aruba sen agi ochimashir ketdangser kar dang takar akümer. Tanü asen lima nung lenmangtem ajak lenmang masü ayong mesuka kümogo. Sorkar office nung tenzükertem karibo sungo ajemtsü magütsüra, File mapang talangka sui-aka lapoka mereprangi toktsüba, sorkar tenzüker pei itasen nung katizüka ayuba pei tangutsü tim anguba nunga, tenzüker karibo sungo ajemtsü yimlaba mesura katizükba, pei tangutsü tim 'Bill' yanglutsüba-a tenzüker karibo sungo ajemtsü magütsüra, mapang talangka meyanglutsüi ayuba...lba amaji nuburtemi nungsen jembiba angazüker. Aji oda, nuburtemi nungsen jembiba amaji shitak inyaka lira melenshitsüla. Shitakba-bo sorkar tenzükerji iba mapaji inyaktsü atema sorkari itasen dalang agütsür ayu ta angatetsüla. Anungji sorkar tenzüker ajaki nuburtemi tenung sena mejembitsüsa pei mapa nung ochishia nendak-nendaka inyaktsüla.

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

# Osangtajung kentener 'The Nelons' telok nungi züngsem asem asü



The Nelons

**July 27, 2024:** Osangtajung kentener telok 'The Nelons' nungi züngsem asem tayimtsü tsükokba lendong ka nung süogo.

Rong ka nung kententsü atema Hokolbarnü (July 26) tayimtsü ka nung aodang Jason Clark, Kelly Nelon Clark aser lar jala Amber Kistler nunger lendong ajurua asü. North-eastern Wyoming anasa tayimtsü tsükokba lendong nungji Amber Kistler kinüngbu, Nathan-a asü.

The Nelons telok nungi züngsem asem asüba sülen joko iba telok nung Autumn Nelon Streetman dang anüngogo.

Instagram post ka ajanga Gaither Management Group-i, "America nung aikati meimba osangtajung kentener kibongtem rongnung ka- The Nelons telok Hokolbar nikongdang Gaither Homecoming Cruise atema Alaska-i aoba mapang tayimtsü tsükokba

lendong nung asü. "Tayimtsü tsükokba lendong nung asürtemji Jason aser Kelly Nelon Clark, Amber aser Nathan Kistler, aser parnok den yariteper Melodi Hodges, pilot Larry Haynie aseer pa kinüngtsü Melissa nunger lir. National Transportation Safety Board-i iba tatalokba ya bushisüngdangdar," ta Management Group-isa metetdaksü.

Autumn Kistler-i sangdong ka ajanga, "Tang tashi nungbo nenok aikati iba osang ya angashir alitsüa akok- kübu aser kütsü na- Jason aser Kelly Nelon Clark na den kü aianu Amber aser la kinüngbu Nathan, kü medemertem- Melodi Hodges, Larry aser Melissa Haynie nunger Hokolbarnü tayimtsü tsükokba lendong nung süogo. Kü den kü kinüngbu Jamie, kobi meli asotsü aliba jabaso, Jason'er tsüraburtem- Dan aser

Linda Clark nunger atema sarasademtsüba asoshi pelar. Nenoki maneni sarasademtsüba, temeim sayuba aser nungita yariba atema ajak dang pelar," ta metetdaksü.

Bill & Gloria Gaither-i Alaska cruise nung kenten sentong ka ayongzük aser iba sentong nungji shilem agitsü atema The Nelons telok-a jaoka liasü.

2021 küm The Nelons teloki Dove Award ngua liasü. Parnoki Bluegrass/Country/Roots Recorded Song of the Year (If God Pulled Back the Curtain) award angu aser 2017 küm nunga parnokisa kasa category nung 'When Grandpa Sang Amazing Grace' ken ajanga Song of The Year award ngua liasü.

1970s nung Kelly tebu Rex Nelon-i The Rex Nelon Singers telok tenteta liasü aser kümtem süia arudang parnok The Nelons ta tenüng melena liasü.

# Kerala nung Khristan putir ka aser nun ka na soseta sür lia angu

**July 26, 2024:** South India nung aliba diocese temi tatalokba balala ana nung putir ka aser nun ka soseta asüba atema aoksar, ta metetdaksü.

July 25 nü Kerala state nung Kothamangalam diocese kübok Vazhakulam nung aliba St. George Forane Church nung vicar, putir Jose Kuzhikanniyil süadoker lia Arogo züngsemtemi angu.

Parnoki arrshi küm 64, Jose ji ilonga anasa aliba hospital kati anir ao, saka doctor temi pa sür bener aru, ta metetdakja liasü.

Ano tanga tatalokba ka nung, Kerala nung Kanjirappally diocese kübok Kanijramala nung aliba convent ka nung Sisters of Adoration of the Blessed Sacrament (SABS) nung züngsem, Sister Ann Maria

la takdang nung lisü amshia soseta sür lia angu.

Arrshi küm 50 nun Ann Maria ji convent nungji temeja sarasadem agia tanela nung asentenshiba mapang ka liasü. Syro-Malabar Church indang dioceses anapronglaji central Kerala nung lir, kong nüburtemi Catholic putirtem aser nun tem kanga akhümtsübur.

Putir Jerin P John-i, "Onok indang parish nung putir soseta asüba osang angashia onok kanga aoksar," ta metetdaksü.

July 25 nü osangbener den jembidang pai, Kuzhikanniyil ya temeim aketba nisung ka liasü aser pai kodanga timtem majangshii liasü, ta metetdaksü. Ajisüaka putir Kuzhikanniyil dak diabetes

den külemi temang nung timtem aika liasü.

Anogo ka jakdang pa bank ka indang centenary sentong nung dena liasü.

Ano külen diocese-isa, Sister Maria ya tesüiba küm aika medical treatment agia aruogo, ta metetdaksü.

Kanjirappally diocese nung Christ Raj (Christ the King) Church trustee, Cheriyan Joseph-i, "Putirtem aser nun tem mapang shia soseta asüba osang ya onoki mamangteter aser aoksar," ta metetdaksü.

Putir tem aser nun tem soseta asüba kuli jangjatsü atema Arogoi inyakyim nung tashimait lira ibaji bushitsü nungdak, ta paisa metetdaksü.

Nütsüng million 33 aliba Kerala state nung nütsüng shilem 18 bo Khristantem lir.

# ANO GO ABEN TSÜNGREM DEN

## KHRISTA AJEMALUBA AJIZÜKA JAJADI

*Ambangyim aser amajok asüküm agi kecha teinyak; saka ajemalu shisatsü agi nisung shiai pei dang nungibo pi taoba ta züngshiangma. Nenok nisung shiai pei indang mebilemi pi indang bilemmangma. Anungji Khrista Yisu dak koba mulungsentsü liasü, aji nenok daka liang: Filipi 2:3-5*

Paul tepuokdak alidang pa yariba asoshi Filipi nunger dang kanga pelaba, ano adianu temeimtep nung tali akanga alitsü indang shia zülu. Tangar mezüngoki ambangyim aser asüküm shisatsü meli-i, kati-ka taoba ta temeimtep nung züngshitepa tenzüktepa alitsü ajungshi.

Iba Laishiba study asüdang ni tain kümer college nung azüngba mapang kenü onok Bagde mates department balala exposure-cum-ministry tesayuri anir ao. Aser ni tanur tila aliba agi motettsüsa aküm nung ni kü medemer dang sodi shijang ta ashi. Yamaji parnoki inyak. Saka tasüng Principal-i pa officei onok aja aser kü dang tenüng jaa na kechiba sodi memeshi ta ashidang ni kü medemertem dang shiokogo ta ashi. Principal-i proffesor incharge dang yimya awashi tajung danga sayua ashi nung ajungtsü ta ashidang sorry ta ashi. Iba anogo nung nia yimya awashi meteta kü temeten mebushi akümtsübu agüja sorry ta ashi. Shiba dang kechi jembitsü ibaji mapang nung inyakrapang temeimtep adoker, maksü nungi kümzüker. Yisu Khristai Tsüngrem jenjang toktsür ajemalua tila kümer arua teyangluba ajak nem tekümtet agütsü. Asenok ajak khrista sülen anidaker ka südi ta ayongzüker. T.Ken 133:1 nung "...ajiang, adianuten külemi telungjem nung alitsü koda tajung aser jangratentsü lir. Khrista ama ajemaluba sobutsü sobur pa den telongjem nung lidi. Amen

# Indonesia nung ano Muslim nungertemi Arogo ka anema inyak

**July 27, 2024:** Indonesia nung lokti jagi shia Khristantem ano Muslim nungertemi Arogo nokdanga liasü.

ka nung züngsemtem dang Tesalonika Arogo nung tekülem sentong agiba züngsem kati, Khristantem anenang ta tetuyuba agüja Puri Naga Indah complex nung amokmeren, ta International tekülem sentong agia aru, Christian Concern (ICC)-i ajisüaka 'lease' tembangba agi metetdaksü. parnok ki ka nung adenshia

Teluk Naga District kübok tekülem sentong agir, ta metetdaksü.

Kampung Melayu Timur nung Indonesia nung yimti tulutem Muslim nungertemi Tesalonika nungbo Khristantem sadem- Arogo nung züngsemtem dang nungbo Khristantem sadema tekülem sentong tekülem sentong agiba agiteter, ajisüaka yimtsüngtem anenang ta tuyua Khristantem nungbo Khristantem tekülem nem timtem agüja liasü.

Muslim nungertemi sentong agiba nokdanger, Khristantem anema apusoba amokmerener aser tekülem video ka tan hopta social sentong tagidak mapang media nung kanga prokshio. amaker.

Iba tesem nungji alir kati Talisa Indonesia nung ashiba agi, iba area ji Muslim Muslim nunger aikati Islam nunger nütsüng teimba aliba yimsü toktsür Khristan yimsü tesem ka lir, anungji Tenla agizükba agi Muslim yimsü alia kidangji Khristantem tekülem amangertemi Khristantem dak sentong magidaksütsü, ta tenük yoker.

AO OSHI ANGAZÜKDAK:

TANÜ ANGAZÜKTSÜBA OJANG



Takong

(adj) tzü mali akümba, tayi masü (dry)

\* Asenoki shi takong kanga chinür.

Taksepe

(n) yong agi atakba khu (bamboo made rucksack)

\*Lanubai taksep nung aonsutsü amena bener adok,

OLONG PAITEP # 6858

Grid for crossword puzzle #6858 with numbers 1-17.

TIPIEN

- 1. Nüji masü - (4)
3. Technütsüka - (6)
7. Aketa shirangba - (5)
8. Pi - (6)
9. Amena - (5)
10. Kinü - (5)
11. Tanang masü - (5)
13. Lenmang - (6)
15. Nübo tedi - (5)
16. Tuoshi - (6)
17. Shiruru apuba temenatsü - (4)

LANGTSÜNGLEN

- 1. Jila tulu - (5)
2. Sarasademdang tembang - (4)
4. Tarutsü indang ashitem - (6)
5. Alia - (5)
6. Mojing - (5)
9. Tai inyakba metet - (5)
10. Medemer chijiba - (6)
11. Tatokba / Amadok - (5)
12. Anüngdang masü - (5)
14. Jabaso masü - (4)

OLONG PAITEP # 6857 TELANGZÜBA

TIPIEN :

- 1. Lemsa, 3. Osang, 5. Mezüng,
6. Agi, 7. Süra, 8. Tebutem,
9. Amen, 12. Odi, 13. Asayar,
14. Angsü, 15. Agima.

LANGTSÜNGLEN :

- 1. Lamem, 2. Sangken, 3. Omen,
4. Asüküm, 7. Sendong, 8. Tejang,
10. Tanga, 11. Tazü.

NAI-A YA METETTER MA



Hollywood actor ana- Ryan Reynolds aser Hugh Jackman na nem Guinness World Records ana agütsüogo. Marvel superheroes ana indang tesüsaba film Deadpool & Wolverine sayatsü lia iba official GWR certificates agütsü.

Wrexham AFC nung co-owner ka ama Reynolds nem Wrexham, Wales, UK nung aliba Racecourse Ground ya 'oldest international football ground' ta asüba certificate ka agütsü. Iba ground ya April 5, 2024 tashi nung küm 147 ser anogo 31 amshia arur.

Iba sülen Guinness World Records Adjudicator Will Munford-i Ryan Reynolds aser Hugh Jackman na nem Deadpool & Wolverine atema 'most viewed movie trailer in 24 hours' indang certificate agütsü.

Iba advert ya Super Bowl LVIII nung sayua liasü aser February 11 aser 12 anogotem 365 million global views liasü.

Guinness World Records Editor-In-Chief Craig Glenday-isa Reynolds nem 'longest career as a live action Marvel superhero' GWR certificate ka agütsüogo.

Assam aser Arunachal state police nung 'Agniveers' anioktsü



Guwahati/Itanagar, July 27, 2024 (Agencies): Agnipath Scheme pusema nungittsü atema Assam nuni Agniveer teimbaka Assam Police nung anioktsü ta Assam Chief Minister Himanta Biswa Sarma-i metetdaksüogo.

Prime Minister Narendra Modi-i Indian Army modernizing asütsü mangdang ataloktsü atema Assam sorkari inyaktsü ta CM Sarma-i ashi.

"Opposition-i Agnipath Scheme indang tiyazü prokshiba ajanga Indian Army tashimait kümdaktsütsü meranger saka Bharat-i ibaji matalokdaksütsü" ta pai ashi.

Assam sorkari Agnipath Scheme pusema nungiter aser state sorkari Agniveers yaritsü. Iba ajanga state security aser national defense modernization nung shilem agitsü, ta Sarma-isa ashi.

July 26 nü Kargil Vijay Diwas

benjung amongdang Congress-i Prime Minister Modi aija liasü.

"Iba ama anogomong nung PM Modi-i Agnipath Scheme indang jembibaji nungdak maliba politics lir. Kargil Vijay Diwas amala anogo nung tasürtem nem tetushi agütsüba mapang PM Narendra Modi-i iba ama politics inyakba atema sasa bilemer. Prime Minister shingaia iba ama meinyakdang" ta Congress president Mallikarjun Kharge-i ashi.

PM Modi-i Dras nung Kargil War Memorial semdangdang Agnipath Scheme pusema jembia aser Opposition-i national security atema politics inyaker ta aija liasü.

"Agnipath scheme ya Army-i nungdakba reforms inyakba ka lir. Tia maka nisung kari national security dak sendakba onük politics kümdaktsüogo. Item kasa nisungtemi sen crore aika miimzuka agia asen Army

tashimait kümdaktsütsü merang" ta Modi-i ashi.

"PM Modi-i tiyazü prokshir. Taoba Army Chief General MM Naravane-i Agniveers 75% tashi kümsük tembanga inyaktsü ta ashi saka scheme tenzuka aodang iba ama meinyak" ta Kharge-isa ashi.

Külen, Arunachal Pradesh sorkari lisopur lanurtem Agnipath scheme kübok anioktsü atema mapa tenzüksü aser state police, emergency aser fire services nung retired Agniveers anioktsü metetdaksüogo.

Arunachal Pradesh sorkari Agnipath scheme kübok lisopur lanurtem anioktsü atema training agütsütsü ta chief minister Pema Khandu-i ashi.

Arunachal Pradesh nungi retired Agniveers nem Arunachal Pradesh police, AP Battalions aser Emergency and Fire Services nem maongka agütsütsü ta CM Khandu-isa ashi.

Manipur nung bomb 2 yutsüba atema lungkak ait

Imphal, July 27, 2024 (Agencies): Imphal East aser Imphal West district tem nung bomb ana yutsüba sülen nisungtemi lungkak aitba sentongtem ayongzuka agiogo.

Manipur police headquarters nungi osang angazükba sülen bomb detection & disposal squad-i Imphal East district kübok Thangapat nung ki ka anasa grenade ka angu.

Mejangjatetba nisung kari Honibarnep 5:00 ako meta Rural

and Engineering Department nung Executive Engineer Haobijam Baliadas'er kidang bomb ji yutsü.

Iba sülen, Imphal West district kübok Chingamakha Tomal Karak nunga tanep 11:00 ako meta Imphal Finance nung Managing Director Warokpam Geneshore'er kidang bomb ka yuja aliba angu.

Bomb anaprongji Imphal West district nung dumping side nung raksa endokogo.

Iba mapa ya kechi atema

inyak'ar memetet saka senotsü meshiba atema asütsü akok ta bilemer. Tang tashi nung telungpur telok mesüra kija shingaia tenüng agiba mali.

Iba atema Imphal West aser East kübok tesem kar nung nübortemi mener lungkak aitba sentongtem ayonga agiogo.

Parnoki tekaratiba nung olemtep ajanga ken o angatetteptsü aser tarutsü nung ibala mesükba mapa meinyaktsü metetdaksüogo.

Meghalaya nung Assam garitem noktanga magizüker: AASU & KSU

Guwahati, July 27, 2024 (Agencies): Meghalaya-i Assam-registered garitem marudaktsüi noktanga magizüker ta All Assam Students' Union (AASU) aser Khasi Students' Union (KSU)-i metetdaksüogo.

North East Students'

Organization (NESO) kübok AASU aser KSU-i iba tebilemtsü onük tekaratiba nung angatetteptsü shiogo.

Assam aser Meghalaya tsüngda alemli nungi tesentaktep tajung nung dang lia aru aser ibaji meraksatsüla ta AASU aser KSU-i ashi.

Parnokisa state anaprong sorkartem dang putepa alitsü aser angatetteptsü ayongzükogo.

HNYF-i Meghalaya kübok tesem kar nung Assam registration garitem marudaktsüi noktanger. Gari teimbaka tourist garitem lir.

UNESCO World Heritage list nung 'Moidam' züngsemogo

Guwahati, July 27, 2024 (Agencies): UNESCO World Heritage List nung Ahom chuba yimli mapang mang aremba 'Moidams' züngsemogo. Northeast nungi cultural property mezüngbuba züngokbaji iba ya asütsü.

World Heritage Committee (WHC) indang 46 buba session

nung iba lemtet agi.

Tai-Ahom chuba yimli mapang küm 600 shi ka tasü mang aremba tesem ya amshia aru. 2023 nung Assam state sorkari Prime Minister dang UNESCO World Heritage List 2023-24 nung iba ya züngsemtsü atema shidi ka zülua liasü.

Tesüba nunga International

Council on Monuments and Sites (ICOMOS)-i UNESCO World Heritage List nung 'Moidams' züngoktsü atema shia liasü.

UNESCO World Heritage List nung 'Moidams' züngokba atema Assam Chief Minister Himanta Biswa Sarma-i Prime Minister Narendra Modi dang pelaba metetdaksüogo.

# Bangladesh nung kaketshir lenir asem mozükidang lia apu



Bangladesh nung kaketshirtemi longkak aitba mapang tangokba noksa angur (File)

**Dhaka, Chiteni/July 27 (Agencies):** Bangladesh nung ketdangsurtemi kaketshir lenir asem puogo, shirnoki sorkar mapa mekazüka toksüba anema longkak aitba sentong balala ayongzüka agiba achaayangba nung teyari agüja liasü.

Linük ajunga nung mepetmesü tulu adoka longkak aitba den curfew benokba aser internet shibanga toktsüba sülen anogo ishika lir item lenir asem ya mozükidang munga lia pua liasü.

Ketdangsurtem yagi Students Against Discrimination movement lenir asem ya Hokolbarnü linük yimtiba Dhaka nung Gonoshasthaya Kendra hospital nungi kangshia discharge süja liasü.

Police-i mezüngbo Nahid Islam, Abu Bakar Mazumdar aser Asif Mahmud nunger mapu ta shia liasü. Ajisüaka iba sülen Home Minister Asaduzzaman Khan-i osangbenertem dang ashiba agi, "parnok tsübua liasü aser nisung kari parnok amokmerener ama bilema liasü."

Ajisüaka Khan-i parnok asem ya formally apuba mapu iba indang osang magütsü. "Parnok kümzüka toktsütsü atema onoki bilemer aser shirnoki parnok amokmerener aji jangjatsü atema parnok dang ken o ashishitsü nüngdaker. Ken o ashishiba sülen onoki taruba jenjang agitsü," ta pai ashi.

Security forces-isa, Dhanmondi tesem nung amendaker aliba iba mozüki nungi ward boy-a ka anirogo aser Islam tetsür aser kinungtsü

indang phone meshia ayuba den Mazumdar aser Mahmud na indang phone-a meshia ayu.

Al Jazeera team-i parnoki den sensaksemtsü merangba sülen ghond ka shi lir iba ya ataloka liasü.

Islam-i taoba hopta osangbenertem dang ashiba agi, pa par medemer ka kidangi nungi pua bener orr rishikangshiba sülen pa taküm asoshi shisabulua bilemer.

Taoba hopta longkak aitba sentong kanga mejungi küma azütokshi lendong atalokba sülen nisung 150 dak tema asü aser nisung meyirejang aika pua liasü. Sorkar pusemba kaketshir lokti tentetemi longkak aita alirtem amakba sülen iba lendong ataloka liasü.

Longkak aiterter mezüngbo yimjung nung dang longka aita liasü aser parnoki 1971 küm Pakistan nungi nüjiso atema raraba nung shilem agir chirnurtem nem sorkar mapa shilem 30 mekazüka toktsüba anema nokdaka liasü.

Supreme Court-i taoba hopta menden mekazüka tokja aliba timba aginja shilem 93 merit dak ajemdaker mapa agütsütsü asoshi obendang agütsüogo aser sorkari iba obendang agütsüba ya agizükogo.

Longkak aiterter tashiyim amshia azüokba den curfew benokba aser internet aser phone communications shibangtsüba sülen kaketshir lenirtemi takhangba teku agütsü, kong Ato Kilonser Sheikh Hasina-i yimjak nung tatok

meshitsüba, police ketdangsurtem, minister tem aser university tekolaktem mapa nungi anentsütsüba densema liasü.

Curfew ya anogoshia mapang tatsüba tatsüba kümja arudar aser internet connection-a tanaben agütsüba den shishilembaba balala lapoktsü atema temelaba agütsüogo.

Ajisüaka tesem aika nung tenokdangba balala agütsür lir, kechiyong nisung aika tepsetba ajanga kaketshir lenirtemi longkak aitaba sentong ayongzüka agitsü akok ta bilemer. Iba ajanga rongsenketzüng nung kongshiogo, koba lanurtem mapa manguba aser oset nung jenjang aika akümba ajanga kongshir liasü.

Bangladesh indang minister of state for information and broadcasting Mohammad Arafat-i Al Jazeera den sensaksemba mapang ashiba agi, "extremists aser terrorists" densema tanga teloki iba mepetmesü rongmesoa liasü.

United Nations high commissioner for human rights, Volker Turk-i, meimchir temeden anema inyaksangshiba atema bushisüngdang asütsü ayongzükogo aser ashiba agi, sorkar den sendaka aliba teloktemi tashiyim amshia iyaksangshiba mapang nisung aika akoksaogo.

UN experts telok katia, sorkari tashiyim amshia longkak aiterter azüoktsü merangba atema jurila bushisüngdang ka asütsü ayongzükogo.

OFFICE OF THE  
 CHANGTONGYA MONGKUM KIDONG TELONGJEM DIMAPUR  
 P.O. DIMAPUR: NAGALAND  
 Ref No NIL Date 27th July, 2004  
**TENÜNGSANG AGÜTSÜR**  
 Dimapur nungi ozü Changtongya Mongkum kidong rongnungi Wb. Chubatemjen NCS S/O A.M. Toshi Jamir, Joint Secretary Govt of Nagaland kasa rank nung süaka District ka nung tekolak asütsü DC Shamator akümba asoshi kidongpuri khonang nüngsang tulu agütsür  
 Naga nunger nübor asoshi ne shisa tajungi maneni nendaka tajungtiba nung nübor tenzüktsü Tsüngremi anema aliba den arishi moajang.  
 Sd/- Sd/-  
 Marbenba Jamir Imti Jamir  
 President Secretary

# ASEAN lenirtemi SCS & Myanmar ken o sensak asem

**Vientiane, Chiteni/July 27 (Agencies):** Southeast Asia nungi lenirtem Laos nung senden amenba mapang South China Sea nung mangatettep adoker aliba, Myanmar nung rara tali kümyonga aoba Southeast Asia nung tsükchitep adokba dak sendakba nung sensaksemogo.

Honibarnü senden nung United States, China, Russia, Japan, India aser Australia densema Association of Southeast Asian Nations (ASEAN) den sendaktepa aliba linüktem adenshia parnok tesendaktep akangshitsü aser security daksendakba ken o tongtibangtem sensaksemogo

US Secretary of State Antony Blinken, Honibarnü linük yimtiba Vientiane atong aser pa China indang Secretary of State Wang Yi den ajuruteptsü imlar, kechiyong nung parnok inyakyim atsülangshitsü mernga arudar.

Senden mamen tsüngda ghonda ishika lia Bilken-i, iba bloc indang foreign minister tem den sensaksemba mapang South China Sea nung China-i ozüing alema Philippines anema jenjang agiba aitsüogo.

Philippines aser China na mapang talangka tzüym nung tesem kar atema mangatettep adoka arudar, koba tzü-lenmang tongtibang ka lir aser iba ajanga kümshia USD trillion aika alang shishilemba balala süia aoe.

ASEAN züngsem Vietnam, Malaysia aser Brunei nungera

South China Sea nung China den mangatettep adoker lir, shirnoki iba tzüym ya tuluba ka parnok meyong ta ashir.

Tanga ken o tem rongnung Blinken-i, rongsenketzüng nung tesendaktep aser Myanmar nung meimchir temeden anema inyaksangshiba indang benoka sensaksema liasü.

Ken o aika nung ASEAN züngsemtem tebilemba balala lir asünung osang tongtibangbo kecha sangdongtsü mimlar. Tzüym nung China inyakyim dak sendakba ken o koda achaayangtsü iba dak sendakba nung telok yongtsü nung telem dang adoker lir.

Indang indanga shilem agiba ajanga mangatettep tuluba küma aotsü ta aikati shisabulua bilemer. Indonesia-ia Beijing-i parnok indang exclusive economic zone nung inyaksangshiba atema süoki ia bilemba lemsatepogo.

Kasa mapang nung ASEAN züngsemtemi teyari peria magütsüba atema Philippine sorkari ashishiogo, saka mangatettep adoker aliba bentettsü atema China aser Philippines na tangatettep ka dangi aruogo.

Kasa mapang nung Australian Foreign Minister Penny Wong-i Myanmar nung military yimsüsürtem dang linük nung civil war tembangdaksütsü aser yimjung asoshi ASEAN-i onük kar benoker aliba sülen tashi anga anidaktsü atema parnoki nangzüker aliba ataloktsütsü ayongzükogo.

**WORLD HEPATITIS DAY** 28<sup>TH</sup> JULY 2023

THEME "IT'S TIME FOR ACTION"

ALIMA NUNG KÜM SHIA NISUNG MILLION AIKA HEPATITIS B & C AGI ASÜR ASER ASÜR TIMBA KÜMA ODAR

## Jenjang agiang Tashidak tendangang

- TEMESEN CANCER ADOKDAKTSÜBA RONGNUNG HEPATITIS YA TONGTIBA LIR
- COVID-19 SÜLEN HEPATITIS YA ALIMA NUNG MESEN RONGNUNG TAMAJUNG TIBA LIR
- JENJANG AGIANG. HEPATITIS TENDANGBA ASER TREATMENT INDANG BUSHITETANG. TEST.TREAT.VACCINATE.
- MAPANG TINTOK. LENIRTEM, DOCTOR TEM ASER LOKTI BALALAI TANG JENJANG AGITSÜLA

FOLLOW US @nhmnagaland @NagalandNhm

FOR MORE INFORMATION CONTACT THE Chief Medical Officer's Office/ Nearest Health Center.

**FREE** SCREENING & TREATMENT FOR HEPATITIS B & C AVAILABLE IN ALL DISTRICT HOSPITALS AND COMMUNITY HEALTH CENTERS

VIRAL LOAD TESTING FOR SERO-POSITIVES AVAILABLE AT ALL DISTRICT HOSPITAL

### China-i taküm Olympics nung mezüngbuba gold medal nguogo



Tang asaya aliba Paris Olympic nung China nung shooter Huang Yuting (tabelen) aser Sheng Lihao na 10m Air Rifle Mixed team event nung gold medal anguba sülen tangokba noksa nung angur.

**Chiteni/July 27, 2024** (Agencies): China nung tarep temeyoktep asayar Huang Yuting aser Sheng Lihao nati Honibarnü 10m air rifle mixed team event nung South Korea nung tarep Keum Ji-hyeon

aser Park Hajun na koka tang asaya aliba Paris Olympics 2024 nung mezüngbuba gold medal nguogo. 10m air rifle mixed team event final nung China nung tarep yagi 16-12 agi Korea

### Olympics: India nung Rower Balraj Repechage round-i iogo



Balraj Panwar

**Chiteni/July 27, 2024** (Agencies): India nung rower Balraj Panwar, tang mezüngbuba Olympics nung asayaba mapang tebur Single Sculls event nung pezübuba nung tembangba liasü. Arishi küm 25 tain asayar ya Deobarnü repechage round nung asayatsü.

Panwar-i alizüng 7:07.11 nung atong aser pa New Zealand nung Thomas Mackintosh (6:55.92), Stefanos Ntouskos (7:01.79) aser Abdelkhalek Elbanna (7:05.06) nung sülen tembangba liasü. Heat shia nungi top 3 nung tembangba asayarem

quarterfinals atema qualify asür. Repechages round nung Panwar, semifinal mesüra final-i aitsü atema tanabenbuba maongka angutsü.

Iba asaya masaya tsüngda Panwar-i Honibar anepdang pa indang social media account ajanga, linük nema dangaktsütsü atema pai takokba tashi tajungtiba asayatsü merangtsü, ta shia liasü.

"Ni Paris 2024 Olympics nung asayatetsüsa JSW aser IIS nati teyari agütsüba atema kanga pelar. Nenok nema dangaktsütsü atema ni takokba tashi tajungtiba asayatsü merangtsü," ta Panwar-i

### Atletico-i Le Normand alizüktsü mulunga agizükogogo

**Chiteni/July 27, 2024** (Agencies): Atletico Madrid-i Spain nung defender Robin le Normand Real Sociedad nungi alizüktsü atema mulunga agizükogogo.

Arishi küm 27 tain centre-back yagi taküm Spain team-i Euro asayamung akokba nung tongtibang shilem agia liasü.

Atletico-i sangdong ka ajanga ashiba agi, asayar ya holidays nungi kidangi meyipa

aruba sülen tenangzüktepba tembangba yanglutsü.

Real Sociedad-isa, La Liga nung külem club Atletico den asayar ka asoshi tenangzüktepba yangluba jangjatsüogo. 2021 küm Real Sociedad puri Copa del Rey akokba mapang Normand-i team nem teyari tulu agüja liasü.

"Robin ya Sanse nung season ana asayaba sülen 2016 küm Zubietta-i aru. Pa

nunger tarep ya koka liasü. Bronze medal atema asaya nung Kazakhstan nung tarep Alexandra Le aser Islam Satpayev nati Germany nung tarep Anna Janssen aser Maximilian Ulbrich na 17-5 agi koka par linük atema taküm Olympics nung mezüngbuba medal nguogo.

Iba asaya nung India team-a asaya liasü saka medal rounds atema qualify mesüteti liasü. Ramita Jindal aser Arjun Babuta na point 628.7 ngua tena trokbuba nung tembang aser Elavenil Valarivan aser Sandeep Singh nati point 626.3 ngua 12buba nung tembangba liasü.

Ramita aser Arjun Babuta na shot asem akhatsü anunga lia pongububa nung liasü saka point 1.0 agi medal round metongtet.

Tanabuba relay nung Babuta-i asaya kanga junga tenzük aser pai 10.5, 10.6, 10.5, 10.9, akha aser kasa mapang nung Ramita-i 10.2, 10.7, 10.3, 10.1 kha-a tena top 8-i ai.

zülutsü.

Taküm küm tetenzüklen tebur single sculls (M1x) event nung bronze medal anguba sülen Panwar ya India nung rongnungi rowing nung Paris 2024 atema quota anguba mezüngbuba asayar aküm. Rowing asayar nung India nung rongnungi pa kija lir.

"Onok anogo 20 jilia ao asünung balakabo mebilemstü. Iba ajanga tsüngsang mopung jangja akümstü atema teyari agütsütsü aser renema litettsü," ta SAI, IOA aser Rowing Federation of India-i ayongzükba virtual media interaction ka nung o jembiba mapang Balraj Panwar-i ashi.

Haryana nungi arishi küm 25 tain asayar ya 2020 küm asaya tenzük aser national rowing competitions tem nung takok tajung ngua kanga nungtuagu aküm. Pai 40 aser 41buba Senior National Rowing Championships nung medal angu aser Goa nung 37buba National Games asayaba mapanga medal ngua liasü.

Paisa, 41buba Senior National Championship nung 500m event nung bronze medal ngua liasü.

Panwar-i taoba küm Switzerland nung Rowing World Cup nunga shilem agiogo aser 2022 Asian Games nunga pezübuba nung tembangba liasü.

tasembuba season nung mezüngbuba asaya aser iba sülen tanem tanemi first team nungi asayatsü atema maongka nguteta liasü," ta Real Sociedad-i ashi.

"Pa asayar ka ama küm ka nungi küm ka ta kanga renlokaogo aser Sociedad nungi asaya 221 nung shilem agiogo aser iba mapang Copa del Rey title-a kabo benogo," ta club sangdong ajangsa metetdaktü.

### DDCA-i tenünsang agütsü

**Dimapur, Chiteni/July 27 (TYO):** District Cricket Association-i sangdong ka ajanga Watinungsang (ICC certified coach and Indian fast bowling center coach) nem tenünsang agütsüba sangdongogo.

Watinungsang ya Hyderabad nung August 1 nungi 7 tashi lanur asayar ka personal coach asütsü jaokogo, koba Naga nung coach tem rongnungi mezüngbuba lir.

Kasa mapang nung pa ya Naga nung cricket coach tem rongnungi mezüngbuba 2021 küm Mumbai nung Omtex cricket institute (India nung cricket coaching center tajungtiba rongnung ka) nung fast bowler Coach asütsü jaoka liasü.



Watinungsang

Watinungsang ya Nagaland nung cricket asaya nung mezüngpur rongnung ka lir aser pai India kübok tesem balala nung lanur asayatem aika anitetogo.

### Olympics Shooting: Manu Bhaker final-i iogo

**Chiteni/July 27, 2024**

(Agencies): Paris Olympics nung India nung shooter temi asaya junga metenzüktebba sülen Honibarnü Manu Bhaker tasembuba jenjang nung tembangba tetsür 10m Air Pistol asaya final-i iogo.

Arishi küm 22 tain Bhaker-i qualifications nung point 580 ngua tasembuba jenjang nung tembangba liasü. Iba asaya nung Hungary tsür Veronika-i point 582 ngua la temaba jenjang nung liasü. Final asaya Deobarnü asayatsü.

Küm asem tejakdang Tokyo nung mezüngbuba asayaba mapang junga masayatetba sülen Bhaker takümbo medal kabosa angutsü temulungtetba tulu nung asayadar.

Asaya nung Haryana nungi asayar yagi asaya kanga junga tenzük Series 1 tembangba tashi nung point 97 ngua la pezübuba nung liasü.

Tanabuba series nunga Bhaker-i point 97 angu aser la maneni pezübuba nung liasü, ajisüaka Sangwan bo jenjang 26bubai asepzüka alu. Tasembuba series nung point 98 anguba sülen Bhaker tanabuba

jenjangi atu.

Series pongububa nung Bhaker-i shot ka nung point 8 dang angu, ajisüaka iba ajanga la jenjang meraksai final atema qualify süogo.

India tsürtem rongnungi Rhythm Sangwan-a qualifiers nung shilem agi, ajisüaka lai point 573 dang nguteta 15buba nung tembang aser final atema qualify mesütet.

Honibarnüsa Sarabjot Singh aser Arjun Singh Cheema na tebur 10m air pistol event nung shilem agi, ajisüaka final atema qualify mesütet. Sarabjot-i point 577 ngua pa tekububa aser Arjun-i point 574 ngua pa 18buba nung tembangba liasü.

10m air rifle mixed team qualifications nunga India nung tarep tsükatok. Ramita Jindal aser Arjun Babuta nati point 628.7 anguba sülen tena trokbuba nung tembang aser Elavenil Valarivan aser Sandeep Singh nati point 626.3 dang nguteta 12buba nung tembangba liasü. India nung rongnungi Ramita aser Babuta nati tajungba asaya aser tena point 1.0 agi dang medal round metongteti liasü.

#### HOMI BHABHA CENTRE FOR SCIENCE EDUCATION TATA INSTITUTE OF FUNDAMENTAL RESEARCH

Astronomy, Biology, Chemistry, Physics, Junior Science aser Mathematics nung National Olympiad Programme 2024-2025

Iba programme nung shilem aginüba kaketshirtemi November 23 aser 24, 2024 nung National Standard Examinations (NSEs) (for science subjects) aser September 8, 2024 nü Indian Olympiad Qualifier in Mathematics (IOQM) (for Mathematics) nung adentsüla NSE/IOQM nung qualification asü nung dang International Olympiads of 2025 nung shilem agitettsü.

To enroll:

NSEs: <https://www.iapt.org.in> (Aug 21-Sep 14, 2024)

IOQM: <https://www.mtai.org.in> (July 17-Aug 12, 2024)

For more details: <https://olympiads.hbcse.tifr.res.in> <https://www.iapt.org.in> <https://www.mtai.org.in>

CBC 48143/12/0003/2425

#### BILEMDANGANG

"Temelenshi asoshi jenjang tulu tila ajak tongtibang."